

政协荆州市委员会

校勘

清·乾隆

荆州府志

全八册
第七册

长江出版传媒
湖北人民出版社

荊州府志卷之四十四

人物七孝義

以時代爲次，不分縣。

周

老萊子 孝養二親，行年七十，作嬰兒戲。著五色斑斕之衣，戲

舞於庭。嘗取水上堂，詐跌仆地，爲小兒啼。或弄雛鳥於親側，

欲其喜。

《列士傳》。按：老萊《高士傳》稱爲楚人，今郡城西，相傳其故里在焉。故從《湖廣通志》採入，爲孝義之首。

晉

仇勃 南郡廉史。母老疾困，賊至，守衛不移。爲賊拷掠，幾至

隕命。荊州刺史劉弘表爲歸鄉令。

見《晉書》。劉弘傳。

宋

師覺授 南陽涅陽人。與外兄宗少文並有素業，以琴書自娛。於

路忽見一人，持書一函，題曰《至孝師君》。苦前，俄而不見。

乃捨車奔歸，聞家人哭聲，一叫而絕，良久乃蘇。後撰《孝子

傳》八卷。宋臨川王義慶辟爲州祭酒、主簿，並不就。乃表薦

之，會卒。

《南史·孝義傳》。按：義慶表云：『處士南郡師覺授，才學明敏，操介清修。臣往年辟爲州祭酒，未汙其慮，若朝命遠暨，玉帛

遐臻，異人間出，何遠之有？』見沈約《宋書·宗室傳》。而稱覺授爲南郡人，與《南史》異。當是由南陽徙南郡，與宗少文、劉虯等正同。《南史》所書，乃其舊籍。說見《人物一·宗少文傳》下。覽者詳之。

梁

甄恬 字彥約，中山無極人，世居江陵。祖欽之，長寧令。父標

之，州從事。恬數歲喪父，哀感有若成人。家人矜其小，以肉

汁和飯飼之，恬不肯食。年八歲，問其母，恨生不識父，遂悲

泣累日。忽若有見，言其形貌，則其父也，時以爲孝感。家貧，

養母常得珍饈。及居喪，廬於墓側，恒有鳥，玄黃雜色，集於廬樹。恬哭則鳴，哭止則止。又有白雀栖宿其廬。州將始興王憺表其行狀，詔曰：『恬孝行殊異，聲著邦壤，敦風厲俗，弘益茲多。牧守騰聞，義同親覽，可旌表室閭，加以爵位。』恬官至安南行參軍。

《梁書·孝行傳》。

韓懷明

上黨人，客居荊州。年十歲，母患屍症，每發輒危殆。

懷明夜於星下稽顙祈禱，時寒甚切，忽聞香氣，空中有人語曰：『童子母須臾永瘞，無勞自苦。』未晚，而母豁然平復。鄉里異之。十五喪父，幾至滅性，負土成墳，贈助無所受。免喪，與鄉人郭馨俱師事南陽劉虬。虬嘗一日廢講，獨居涕泣。懷明竊問其故，虬家人答云是外祖亡日。時虬母亦亡矣。懷

明聞之，即日罷學，還家就養。虬歎曰：『韓生無虞邱之恨矣！』家貧，常肆力以供甘脆，嬉怡膝下，朝夕不離母側。母年九十一，以壽終。懷明水漿不入口，一旬號哭不絕聲。有雙白鳩巢其廬上，字乳馴狎，若家禽焉，服釋乃去。旣除喪，蔬食終身，衣食無改。天監初，刺史始興王憺表言之州，累辟不就，卒於家。

《梁書·孝行傳》。

江陵王玄紹 弟孝英、子敏，兄弟三人特相友愛，所得甘旨新異，非共聚食必不先嘗。孜孜色貌，相見如不足者。及西臺陷沒，玄紹以形體魁梧，爲兵所圍，二弟爭共抱持，各求代死，終不得解，遂爾並命。

《顏氏家訓》。

唐

力僧護 江陵人。父昌卒，母欲追薦，而無貲。悲哭不已。僧護時五歲，謂母曰：『何不將兒賣以易錢？』母乃抱僧護出市，賣與蜀客，得錢二貫，薦焉。母以憶子哭，目盲。後三十年，僧護還，齋戒叩禱，每日爲母舐目，復明。《楚紀》。

宋

龐天祐 江陵人。以經籍教授里中。父疾，天祐割肱肉食之，疾愈。又復病，目喪明。天祐號泣祈天，舐之。父年八十餘，大中祥符四年卒。天祐負土封墳，結廬其側，晝夜號不絕聲。知府陳堯咨親往致奠，上其事。詔旌表門閭。天祐家無儋石儲，居委巷中。堯咨爲徙里門之石，築闕表之。《宋史·孝義傳》。

張榮貴 遠安人。家團山，九世同居。嘗積穀數千餘石，以贍族。

人及鄉里之賢而貧者。終身不求聞達。號團山居士。

《湖廣通志》。

元

尹夢龍 中興人。母喪，負土爲墳，結廬居其側。手書《孝經》

千餘卷，散鄉人讀之。有羣鳥集其冢樹。

《元史·孝義傳》。

向遜 宜都人。自宋逮元，九世同居，人無間言，稱爲義門。至

正十九年，僉士魏奉訓奏聞旌表。

《宜都縣志》。按：《明統志》誤以遜爲江陵人，《湖廣通志》、《舊府志》

俱仍之。並非。

明

王賢 字希昭，江陵人。洪武初入太學，其友同邑人王讓往，以白金十兩，衣一篋，寄賢所。未幾，賢授鹽城知縣。讓回，亦除泌陽知縣，尋卒。後十年，賢致仕還家，以所寄物呼讓子，

與之。讓子不受，曰：『吾父未嘗言有此。』賢固與之，其子

啟封，見父故衣，乃泣而受。

《明統志》。

田璠 江陵人。性至孝，甘貧讀書，以禮養親。每遇忠義祠廟，

必拱揖而退，言其事，未嘗不感泣也。親病，割股療之，疾尋

愈。迨母卒，廬墓三年。時苦旱，禾稼盡稿。獨璠圃中晨有露

降於蔬，澤如也。其廬中蜘蛛等物，一時盡白，人以爲精誠所

感。璠初遇異人，嘉其孝行，謂璠十年後當死：『吾將遣徒持

藥救汝。』及期，璠果死。遲三時而異人徒始至，詢其故，則

以大風雨所阻，遂不能救。乃出其藥，化白金十兩，爲璠治後

事云。

《三楚文獻錄》。

鄭楫

舊《府志》作楫。

江陵人。五歲失母，楫事父寢食起居必與俱，躬

親服役。繼母性嚴，竭力承懽，卒感化爲慈母。父母歿，結廬墓側，每事敬白如生者。年八十有八，卒於墓側。

《湖廣通志》。

劉永寧

江陵人。以貿絲爲業。一日於通濟橋道旁拾遺金一囊，

計可三百餘。待其人三日，還之。其人願以半相酬，堅卻不受。後，孫大武舉嘉靖戊戌進士，官至副使，建金榜題名坊於其處。孫曾相繼登賢書、列歲薦者甚多。人稱爲金榜劉氏。

舊《府志》。

范養純

江陵人。事親至孝。父母微不懌，必長跪號泣，待色豫

而後起。內行修謹，夫婦相敬如賓。雖燕坐無跛容，接人無少長，咸以禮。里中稱爲范夫子。

《湖廣通志》。

郝經

江陵人。嘉靖壬辰春，沙市火災數起。一日薄暮，火發，

經自外來，見已及舍，急奔入救母。母年八十，驚悸不及出，

遂同死於火中。

《湖廣通志》。

王泰 江陵人。家貧，業梓匠。性至孝，每食，自安澹泊，必得

甘旨以供親。友愛異母弟妹，少有所積，輒均與之。

《湖廣通志》。

虞成之 江陵貢生。甘貧不仕，布衣蔬食，竭力養母。母病，割

股以飼，病頓愈。後又拾遺金於道，待其人，還之。

《湖廣通志》。

藍純 江陵人。應貢將赴南雍，以父老不行。知府吳彥華曰：

『只此一念，可當孝子矣。』及父卒，廬墓不忍歸。士林韙之。

《明統志》。

陳道 江陵人。父銘，患風痺，朝暮奉養，未嘗入私寢。事繼母尤孝。父母卒，廬墓三年，墓產靈芝數本。太守劉節上其

事。《楚紀》。

顏忠 江陵人。節婦劉氏子。劉遭疾，忠禱於北辰，割左股和粥

以進，病愈。劉卒年九十，忠亦六十有五。遼藩大書節孝，立

石於門。《楚紀》。

高嵩 江陵人。性至孝。舉嘉靖癸卯鄉試，一上春官，後以父母

老，更不再赴。力田贍養，自奉親甘旨外，食苦茹淡，有寒畯

所不能堪者。父母既終，竟不仕。《湖廣通志》。

鄧琮 江陵人。精於醫，求濟者不責報。一日，偶於途拾遺金五十

餘兩，以帖招之。及夫婦二人號泣至，乃官物也。還之。《湖廣通志》。

張誠 荊州衛人。性質樸，好施與，能急人之難。歲大侵，道殣

相望，出貲周賑，多所全活，且爲瘞其暴露者。有軍人犯罪當

贖，將鬻男以償。誠代出金，亦不責報。後泛舟公安，遇大風，

溺死甚衆，誠獨免，人咸異之。

《明統志》。

湯玉廉 江陵人。父病篤，廉晝夜籲天。父病稍甦，因肉食味不

適口，密割左乳肉，和粥以進，父病遂愈，廉亦無恙。

《楚紀》。

譚孝子 傳說江陵人。俱割股廬墓。

《湖廣通志》。

周元 自臨江徙家江陵。居積致富，而好行其德。嘉靖三十九年，

黃灘隄潰，出粟以賑貧民。又修治橋路，施藥餌，施棺及地，

歲費千金。里中咸多其義。

《湖廣通志》。

張廷貴 江陵人。白雲橋北有張孝子墓。都御史曹忬爲記，勒諸

石。

《湖廣通志》。

王化行 字以寧，江陵人。生有異慧，年四歲，大父抱膝上，爲

說父早逝，母張氏矢節事。便連日不食，痛哭不止。五歲，就外傳，宛如成人。每一出一人，必白母前，晨省昏定，肅如也。七八歲，見母閉閣一室，手繒績，無移步。輒流涕曰：『母苦節如此，兒他年何以報？』母流涕曰：『讀書成名，則報我矣！』乃奉父木主於閣中，對主讀書。年十五，首補邑弟子員。未幾，登乙榜。嗣以明經入試，得高第。復拔於北闈。逾年，授荆門訓。迎養承歡，事事諮啟於母。至諸生中有不能婚葬給朝夕者，捐俸助之。擢衡陽諭，旋擢知容縣。以母畏舟行，屢具狀請罷歸，以養母。母年九十有六，化行亦年至八十餘。

《三楚文獻錄》。

王紀 字維憲，江陵人。性嚴正，少事父母逮祖母，咸盡孝養。

《湖廣通志》。

潘世學

江陵草市負販也。萬歷己酉二月三日，草市大火，蔓延

千餘家。世學兄弟四人皆趨避。世學愀然曰：『父柩在室，今

俱去，奈何！』因拊棺號慟，誓以死殉。其宅四面蓬蒿，火越

而過。人以爲純孝所感。天啓初，旌其門。

《郢書》。

李名芳

字懋實，江陵人。萬歷間，仕至開州知州。性仁厚，好

施予。歸田後，舍義田建橋道，人嘉其義。兄政芳，任鴻臚寺

丞，亦有厚德。

《李君墓誌》。

靳相

居江陵之草市。家貧，未娶。課童蒙數十，日晡卽下簾讀

書。友人爲卜室。不數年，妻死，遂不復娶。躬執爨以養親。

親歿，因潛於家，不與俗往來。年七十餘卒。

《湖廣通志》。

楊訥 字敏夫，江陵諸生，慷慨激烈。有富娼子劉欽若補邑庠，

訥力攻之。反被誣，闔郡諸生白冤狀，得廩給如故。後以貢，

司江浦訓，有清節。

《湖廣通志》。

陳大可 江陵恩貢。性孝友，精易學，從遊者甚衆。父卒，盡以

其產讓諸弟。敝袍疏食，終身不厭。

《湖廣通志》。

高仕 字行之，江陵人。季興裔孫。天性孝友，喜施予，潛居力

善，義方垂訓。長子文光，歲貢生，季子文鑑，國朝順治乙未

進士，筮仕有良政。

舊《府志》。

李思明 江陵人。父病篤，醫藥莫效。思明剗股肉以進，病遂愈。

院司給扁獎之。

舊《府志》。

李開國 字肇侯，江陵人。讀書務本，力行孝悌。子世濟，國朝

順治中舉人，廣元知縣。致仕歸，卒。

舊《府志》。

王維藩

字現南，江陵人。郡諸生。崇禎壬午，妻朱并二女俱爲

賊掠，維藩呼妻女赴水死。賊遂殺之。

舊《府志》。

劉楷

江陵諸生，有膂力。崇禎丙子，流賊寇荆，肆掠沙津。楷

率義勇楊黃毛等數十人伏東關杉橋門，賊大至，楷呼而起，直

前，斬一賊頭，大如斗，其劍甲上有金篋『八大王』字。賊衆

披靡，荊州之圍以解。楷後戰死汝寧。

舊《府志》。

王圖南

江陵人。壬午避亂晁湖，爲賊所獲，不屈死。

《湖廣通志》。

朱九臯

字似鶴，江陵諸生。癸未春，隨父避賊於羊角洲。賊至，

驅妻女婢婦等三十七人赴水死。乃與弟九嶷亡走公安，謀攻賊。

賊怒，急攻城，臯、嶷悉被執。賊支解之。

《湖廣通志》。

謝幼安 字公嗣，江陵人。癸未秋，賊至龍灣市，幼安貧不能具

舟楫，遂爲所獲。大罵不屈，截其舌，含血噴賊面。妻及子俱

遇害。

《湖廣通志》。

楊正昌 江陵人。癸未冬，父爲賊所執，索金不得，將殺之。正

昌聞，趨往代死。賊遂殺正昌，而釋其父。

舊《府志》。

毛貴章 公安人。讀書知大義。宣德間，山東饑，輸粟千二百石

助賑。事聞，勅建坊，旌曰『義民』。

《湖廣通志》參《縣志》。

馬良 公安人。正統二年，

原作正德四年，今據《縣志》改正。

山東饑，詔天下輸粟得

補爵。良輸粟三千石，不受賜職，乃勞以羊酒。勅旌馬氏『善

良之門』。

《湖廣通志》。

林守成 公安人。成化初，麻寮商人以漆一器寄守成而去。至弘